

# DOMENIE XVIII «VIE PAL AN»

## Jutoris pe liturgjie

Domenie, ai 02 di Avost dal 2020

*Alore Gjesù ur vierzè la ment par lâ a font des Scrituris* (Lc. 24, 45)

**Vite - Bibie - Popul**

pre Antoni Beline e une sô opinion di îr - par fânus rifleti vuê

### ***Rivuart a la fede, o preferis crodi che e sedi simpri***

La fede e tocje duncje la sostance di chel grant rapuart afetîf e efetîf che al pee l'om creât cul so creadôr, il pelegrin in viaç cul Pari che lu spiète.

Inte fede si incuintrin o si scuintrin la libertât dal om e la fuarce di Diu. Partant, se mistereôs al è l'om e plui mistereôs ancjemò al è Diu, no podìn pretindi che la fede no sedi un fat umanamenti indefinibil e incuantificabil. Pretindi di misurâ la fede di une persone al è come pretindi di misurâ il grât di vite che un al à. Pa la cuâl si cjape une responsabilitât tremende chel ch'al dîs che un al à o nol à la fede.

Pre Checo Placerean, ch'al veve un voli e un don straordenari tal pesâ fats e personis, cuant che si tratave di fevelâ de fede di une persone al jere di une prudence uniche e mi restarà simpri te memorie la rispueste che i à dade al professôr di dogmatiche dal seminari in merit de fede: "La fede, jessint un don di Diu e sorenaturâl, e scjampe a ogni control. Rivuart al discors de fede, che e je o che no je, o preferis crodi ch'e sedi simpri, ancje cuant che cualchidun al dîs di no vêle, parcè che no à la prove che no le vedi" (Assemblea de Clero, Udine 25-27 giugno 1975, Atti, pag. 30b).

Che la fede e sedi un misteri lu dîs ancje il Vanzeli. "Il fi dal om, cuant che al vignarà,

cjataràial fede su la tiere?" (Lc 18, 8). Par chel i apuestui i domandin al Signôr: "Fâsinus cressi la fede!" (Lc 17, 5).

*Furtunât il popul che al è il Signôr il so Diu - par une leture sapienziâl de Bibie, p. 154*

\* \* \*

*Prime di dut la muart violente e improvise di Zuan il Batiste al à di vê impressionât Gjesù se al partì di li cu la barcje par ritiràsi tun lûc desert. A fâ ce? A rifleti su ce che al stave sucedint e a domandâ te preiere, indicazioni al Pari che al è tai cîi. Però, la int za lu spietave; al sintì compassion... al vuari i lôr malâts...e... Sore sere... e o sin a Gjesù che al cjapà i cinc pans e i doi pes...*

*I cincmil oms, cence meti in cont feminis e fruts a son vuê aumentâts a milions e milions di puars, di profugos, di miserabii, colms di fan e di virus, cence tiere e cence dirits.*

*La nestre societât, pe plui part, no à la esigence de multiplicazion dal pan, ma indi varès une altre: la multiplicazion a milions de vacine cuintri il covid-19. Cert che Gjesù al dîs: daitjur di mangjâ vualtris, procurait vualtris e al è ce che i sienziâts a stan cirint di fâ prontant l'antivirus. Ju ringraziin. Dome che Gjesù ur disè pai pans, pai pes e vuê pe vacine: "Puartaitmai chi". Di chest, la nestre tronfie societât no vûl savêdint parcè che si ilût di sedi onipotente. Nol è che Gjesù al vuli multiplicâ la vacine, al vûl dome dînus e judânus a mudâ rote, cambia cjâf e cûr e convertisi dal libar marcjât che al impeste e al distrûç la tiere al so spirt di fratelance e di condivison. Pal*

*cristian, in plui, convertîsi de religjon o di une false religjon a la spirtualitât de persone di Gjesù e dal vanzeli.*

*In chest spirt, il miracul al è za fat e pan, pes, vin, mîl, lat e spongje a rivin par ducj; adiriture indi vanzarà dodis, o dodismil o cent e vincj mil sportis plenis.*

#### ANTIFONE DI JENTRADE

Sal 69, 2. 6

Salvimi, Diu, spessee a difindimi.  
Tu sês tu il gno ripâr e la mê difese;  
Signôr, no sta intardâti!

#### COLETE

Vuarde, Signôr, i tiei fameis  
e da la tô eterne protezion  
a di chei che te domandin;  
a di chei che si tegnin in bon  
di vêti par lôr creadôr e paron  
rinove lis robis che ti plasin  
e ten cont di ce che tu âs rinovât.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

#### PRIME LETURE

Is 55,1-3

#### Vignît e mangjait.

*I ultims doi cjapitui (cj. 54-55) dal secot libri di Isaie nus fasin jentrâ te fieste de Gjerusalem rinovade dopo lis tremendis batiduriis dal esil (sec VI p.d.C.). In chê di Gjerusalem e deventarà mari feconde; a rivaran: amôr e aleance, une gnove Sion, il pat eterni, la peraule che e prodûs ce che e dis. E dut chest, cence spindi ni bêçs ni fadie, ma dut al sarà a gratis tal amôr di Diu. Vualtris che o vês sêt, vignît, vualtris che o sês tal fumaton dal virus vignît...*

#### Dal libri dal profete Isaie

Vualtris che o vês sêt, vignît chi des aghis;  
ancje chel che nol à bêçs, vignît!  
Comprait e mangjait cence bêçs  
e cence spindi vin e lat!  
Parcè mo spindêso bêçs par chel che nol è pan,  
e si strussiaiso par chel che no us sacie?  
Scoltaitmi ben, mangjait robis buinis  
e o gjoldarês une mangjative sauride.  
Slungjait la orele e vignît chi di me,  
scoltait e la vuestre anime e vivarà!  
E o fasarai cun vualtris un pat par simpri,  
il boncûr che nol mole imprometût a David.  
Peraule di Diu.

#### SALM RESPONSORIÂL

dal Salm 144

*Chest salm responsoriâl nus presente la muse, o miôr il cûr dal Signôr; a son almancul dodis lis peraulis che nus pinelin la bontât di Diu. No nus restarès che cori cun fiducie a lis aghis de sô sapience e vite.*

**R. Spalanche la tô man, Signôr, sostente ducj chei che a vivin.**

*Se cjantât: Il cjant dai salms responsoriâi, p. 68.*

Il Signôr al è pazient e di boncûr,  
pegri tal inrabiâsi e splendit te misericordie.  
Al è bon cun ducj il Signôr,  
il so afiet al rive sun dutis lis sôs voris. **R.**

I vôi di ducj viers di te si voltin e ti spietin,  
e tu tu ur dâs di mangjâ su l'ore juste.  
La tô man tu tu spalanchis e tu sostentis fin avonde  
ducj chei che a vivin. **R.**

Il Signôr al è just in dutis lis sôs stradis,  
sant in dutis lis sôs voris.  
Il Signôr ur sta daprûf di ducj chei che lu clamin,  
di ducj chei che lu clamin cun scletece. **R.**

**SECONDE LETURE**

**Rm 8, 35. 37-39**

**Nissune creature e podarà mai disseparânus dal amôr di Diu, in Crist.**

*Se il salm responsoriâl nus presentave l'amôr dal Pari, ce vino di dî cumò in chestis pocjiis riis scritis di S. Pauli? Si puedino fâ comentis? Si puedijal zontâ alc? Si puedijal vierzi bocje? O no isal dome di tasê par che il Spirt stes nus riveli ce che nô no rivin a imagjinâ?*

Cui rivaraial a distacânus dal amôr che Crist al à par nô? La tribulazion, la pôre, la persecuzion, la fan, la nudità, i pericui, la spade?

Ma in dutis chestis robis nô o stravinçin in fuarce di chel che nus à volût ben. Di fat o soi sigûr che ni muart, ni vite, ni agnui, ni potencis dai agnui, ni cumò, ni avignî, ni altecis, ni profunditâts, ni nissun'altre robe create no rivarà par mai a distacânus dal amôr che Diu al à par nô, in Crist Gjesù nestri Signôr.

**CJANT AL VANZELI**

**Mt 4,4B**

**Aleluia, aleluia.**

No dome di pan al vivarà l'om,  
ma di ogni peraule che e jes de bocje di Diu.  
**Aleluia.**



**VANZELI**

**Mt 14, 13-21**

**Duc j a mangjarin e a forin saceâts.**

*Tal ultim toc di chest vanzeli, Gjesù al à il stes ategjament e peraulis che al doprarà te ultime cene pe istituzion de Eucaristie: Po al cjapà i cinc pans e i doi pes e, alçâts i vôi viers dal cîl, al disè la preiere di benedizion, al crevâ i pans e ur ai dè ai dissepui e lôr a la int (cfr. Lc 22, 19-20). Chest al significhè che pan pai puars e pan dal Signôr no si pò separâju.*

*O ancje ju separin ridusint la messe a lis regulis di un rît a se stant cence comunitât e cence puars, che al è forzit ce che al sta plui o mancual sucedint. Ma o varin di rindi cont al Signôr.*

*Il segret de multiplicazion dai pans dal vanzeli di vuê al è te Eucaristie, cuant che il Signôr al disè: Chest al è il gno cuarp che al ven dât vie par vualtris (Lc 22, 19).*

Cuant che Gjesù al vignì a savêle, al partì di li cu la barcje par ritirâsi tun lûc desert. Lis folis, a pene savût, a tacarin a lâi daûr a pît, si che, cuant che lui al rivà, al cjatà une vore di int. Alore al sintì compassion par lôr e al vuarì i lôr malâts. Sore sere, si faserin indenant i siei dissepui a dîi: “Il puest al è desert e e je za passade l’ore. Torne a mandâ indaûr lis folis, par che a ledin tai borcs a comprâsi di mangjâ”. Ma Gjesù ur rispuindè: “Nol covente che si ’nt ledin; daitjur di mangjâ vualtris”. Lôr i rispuinderin: “No vin nuie chi, dome cinc pans e doi pes”. E lui ur disè: “Puartaitmai chi”. I ordenà a la int di sentâsi su la jerbe. Po al cjàpà i cinc pans e i doi pes e, alçâts i vôi viers dal cîl, al disè la preiere di benedizion, al crevâ i pans e ur ai dè ai dissepui e lôr a la int. E ducj a mangjarin fin passûts; dai tocs restâts a puartarin vie dodis sportis plenis. Chei che a vevin mangjât a jerin sui cincmil oms, cence meti in cont feminis e fruts.

### SU LIS UFIERTIS

Santifiche, Signôr te tô bontât, chescj regâi  
e, daspò di vê acetade l’ufierte de vitime spirituâl,  
fasinus diventâ ancje nô une ufierte eterne.  
Par Crist nestri Signôr.

### ANTIFONE A LA COMUNION

Sap 16,20

Tu nus âs preparât, Signôr, un pan dal cîl,  
un pan in grât di dânus ogni contentece e di sodisfâ ogni gust.

### O ben: Zn 6,35

Al dîs il Signôr: Jo o soi il pan de vite.  
Chel che al ven di me nol varà plui fan  
echel che al crôt in me nol varà plui sêt.

### DASPÒ DE COMUNION

Compagne cu la tô continue protezion, Signôr,  
chei che tu âs ristorât cul regâl dal cîl  
e fâs diventâ degns de redenzion eterne  
chei che no tu ti stufis mai di vuardâju.  
Par Crist nestri Signôr.

\* \* \*

*Sante messe e Eucaristie, rîts, preieris, cjants: Hosanna pp. 34 - 119.*

\* \* \*

### **Al sintì compassion par lôr e al vuarì i lôr malâts**

*La prima cosa che la chiesa deve fare è porre al centro delle sue preferenze i più insignificanti. Tuttavia qui è decisivo che non si tratta solo di un principio ascetico o spirituale, quanto soprattutto di un principio strutturale nella costituzione stessa della chiesa.*

*Pertanto, la chiesa deve essere organizzata in maniera tale che le sue strutture, il suo diritto, la sua teologia, la sua gerarchia, i suoi ministeri, la sua pastorale, tutto, in essa, sia centrato sui poveri, emarginati e insignificanti.*

*Orbene, se traiamo tutte le conseguenze di questa impostazione, risulterà necessariamente una chiesa molto diversa da quella attuale. Una chiesa in cui i poveri e gli emarginati non sarebbero*

solo oggetto di beneficenza, ma soprattutto, coloro che determinano il pensiero, le scelte, il governo generale della chiesa stessa.

Mi chiedo molte volte perché i testi del Nuovo Testamento, che sostengono il potere e l'autorità, sono risultati essere testi dogmatici e strutturali della costituzione della chiesa, mentre i testi che si riferiscono ai poveri e agli emarginati sono stati presi semplicemente come testi di morale e di spiritualità. Queste domande non hanno altra risposta che l'ecclesiocentrismo le cui radici sono l'affanno del potere e dell'autorità che caratterizza in modo tanto significativo l'ecclesiologia comunemente in uso.

Orbene, fin che non siamo sinceramente coerenti e onesti con tutto ciò che il Nuovo Testamento afferma riguardo alla comunità ecclesiale, non avremo una chiesa autenticamente centrata sul Regno di Dio.

\*\*\*

\* \* \*

- \* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- \* *Il cjant dai salms resposoriâi, Ed. Glesie Furlane, 2012.*
- \* *50 corâi de cristianitât todescje voltâts par furlan, ed. Glesie Furlane, 2016.*
- \* *Il libri des riflessions di pre Antoni al è: pre Antoni Beline, Furtunât il popul che al è il Signôr il so Diu - par une leture sapienziâl de Bibie, Edizion "La Patrie dal Friûl", 1991.*
- \* *Par domandâ chescj libris scrivêt a [info@glesiefurlane.org](mailto:info@glesiefurlane.org)*